

德化縣志

德化縣志卷第八

知德化縣事

高錫三補輯

鄒文炳再輯
陳鼐續輯

風俗

風俗無定乎是宜有定風俗有定乎是宜無定燕趙以慷慨名齊魯以文學著唐魏以勤儉傳如是者有定顧邠岐之士一也周以仁義化民而秦以鬪狠變俗如是者又曷嘗有定化邑地當江漢俗兼吳楚四民樸樸不尚浮華去其喬野澤以文明則有定無定胥善已然而民勞思善逸則忘之數

德化縣志

卷八 地理

風俗

一

十年來質文厚薄之故或稍分今昔矣將爲齊魯乎爲唐魏乎抑爲邠岐之仁義而慮其不盡仁義者乎是在乎主其治者志風俗

白居易集自陶謝諸賢已還儒風綿綿相續不絕

方輿勝覽土瘠民貧山高氣清

舊志德化樸

舊志民俗簡靜罕事浮靡雖富家子弟亦鮮綺羅經營惟在本土不習散四方文儀言語類金陵而近實冠禮間行於士大夫家婚媾不論財娶則親迎婦女惟事鍼紉

不解紡織舉葬娛尸數日近士大夫依朱子家禮鄉民化之鄉市耆民四時有里社之飲

士習詩書率甘淡泊越分者少自愛者多或家計素封知敦古處或硯田自給不競錐刀府志云其君子知耻而少事干謁化邑度不愧焉聰穎之士習爲帖括爭自濯磨聞教開明更知振拔士習文風視前或較盛云

農勤稼穡縣十七鄉江之北居其三封一封二桑落地勢俱較低於南忌水潦地多栽雜糧婦女皆力作不以爲瘁江之南共十四鄉田傍山阜者多旱則資灌於湖港

德化縣志

卷八 地理

風俗

二

溪澗或塘蓄水以溉然獲濟亦僅矣禾之早者六七月間卽刈或旋即栽雜糧冬間又治菜麥終歲恆勤動焉婦女勤作者率在西北兩鄉能知耻雖盡瘁田間衣裙垂敝恒整齊嚴肅絕異廬揚風氣至浮屠老子之宮從無一至佳節良辰未嘗窺闕外焉

工各居肆無精奇之技取給衣食而已
商鮮重資市廛日用所需貿遷有無其居奇遠涉者無有也重去其鄉亦其性如是

冠民年未二十多冠者俗惟卜吉士大夫家近亦鮮行冠

禮

婚納采問名或豐或儉論門第不計財也諏日親迎女家設席以待婿至奠鴈授綬率依附古禮云

喪殮始成服第三日親友往弔喪家裂帛以答亦有擇期治喪而後弔者其葬之遲早則各以家之貧富爲率焉祭春具酒餼祭埽於墳謂之墓祭立祠宇者祭木主於寢室謂之祠祭私居各以時節拜祭於中堂往往禮俗相半云

立春前一日縣令謁府府率僚屬盛儀從迎春於東郊土

德化縣志

卷八 地理

風俗

三

民集觀爲土牛以其色占一歲豐歉芒神或科跣或巾襪云主一歲寒燠至日晨磔土牛曰鞭春民爭拾之以爲得春是日也多爲小土牛置紙亭中佐鼓吹送諸薦紳蓋仿古太守頒春遺意云

元日雞鳴起肅衣焚香禮神祇與其祖先次及尊屬各序拜昧旦擇方隅取吉行日出方親鄰交相賀盛酒饌欸洽尤重設糝

元宵自初十日始裝演戲具張燈鼓樂十六七日尚間有之

清明民間插柳攜楮錢具酒餚祭掃墳墓

春社祭祀畢土人多釀飲名曰社飲

四月八日觀雨暘以占水旱浮屠浴佛有施烏飯者

端午插蒲艾啖角黍飲蒲觴和以雄黃剪綵結方勝人物

相爲傳送龍舟競渡或三四日云

六月六日曬衣土人競爲城隍慶生

中元自朔日始焚香以迎祖具酒餚楮錢追祀之月望乃止

秋社與春社同

德化縣志

卷八 地理 風俗

四

中秋人家餽月餅具紫菱香藕佐觴玩月

重陽登高賞菊花設飲惟士大夫間有之

冬至官司賀長日民間士大夫家間亦行賀

臘月八日民間煮粥食雜以蔬果曰臘八粥是月也多婚

葬

二十四日掃舍宇祀竈薦以錫餅謂甜神之口

除夕聯春帖響爆竹增桃符翦紅紙縛炭樹門後祭祖張

樂設饌燒燭圍爐聚飲坐夜分爲守歲

